



## Early Journal Content on JSTOR, Free to Anyone in the World

This article is one of nearly 500,000 scholarly works digitized and made freely available to everyone in the world by JSTOR.

Known as the Early Journal Content, this set of works include research articles, news, letters, and other writings published in more than 200 of the oldest leading academic journals. The works date from the mid-seventeenth to the early twentieth centuries.

We encourage people to read and share the Early Journal Content openly and to tell others that this resource exists. People may post this content online or redistribute in any way for non-commercial purposes.

Read more about Early Journal Content at <http://about.jstor.org/participate-jstor/individuals/early-journal-content>.

JSTOR is a digital library of academic journals, books, and primary source objects. JSTOR helps people discover, use, and build upon a wide range of content through a powerful research and teaching platform, and preserves this content for future generations. JSTOR is part of ITHAKA, a not-for-profit organization that also includes Ithaka S+R and Portico. For more information about JSTOR, please contact [support@jstor.org](mailto:support@jstor.org).

## GALAHAD AND PERCEVAL

FROM THE "TRISTAN" MS ADD. 5474, FF. 142<sup>c</sup> - 164<sup>b</sup>  
BRITISH MUSEUM\*

(SIR THOMAS MALORY'S *Le Morte Darthur*, Books XI and XII)

### II

O r dist li contes & la uraie estoire le tesmoigne que agloul  
erra .ii. ans entiers que onques ne trouua qui noueles li deist  
deancelot a la parfin ot tant ale que auenture lamena chies  
sa mere qui moult estoit de grant lignage. mais'pour courous  
de son seignour & de ses fiex qui mout orent grant uaselage qui ochis 5  
auoient este si estoit tant desconfortee que ele se sentoit trop pourement.  
& quant ele uoit agloul si en ot moult grant ioie. car bien auoit passe  
.v. ans que ele ne lauot mais ueu. & quant ele le uit si ploura mout de la  
grant ioie quele en ot. quant agloul fu descendus il vit vn vallet deuant  
lui moult biel & moult iouene & moult bien tailliet de tous membres & si 10  
nauoit mie plus de .xv. ans passes [*fol. 152, col. a*] biaux fiex cou dist la  
mere counissies uous cest enfant. dame fait il nenil. enondieu fait ele cou  
est parcheuaus uos freres li plus iouenes de tous mes enfans. quant  
agloul entendi cele parole si en est tant lies quil ne set<sup>1</sup> quil puist faire.  
de son frere que il a ensi trouue. car il samble bien hom qui grant bien 15  
& grant honor doieue auoir se dame diex li done bonte si comme il li  
auoit done biaute. si li fait si grant ioie que plus ne pot & dist a sa dame  
de mere. cest enfant menrai iou a la court le roi artu si receuera lordene  
de cheualerie de sa main meesme.

H a<sup>7</sup> biaux fiex fait la mere il ne place a dieu que il soit cheualiers. car 20  
de cheualerie ne porroit il mie a plus grant honor uenir que mi  
autre fil sont fait qui en sont mort adoulour par armes. & puis que  
li autre sont mort iou garderai le remanant car ia se dieu plaist nel  
garderai. ha<sup>7</sup> biaux fiex ne saues uous le bieles maisnie que iou auoie de  
.vi. fiex dont diex ma deliuree fors de vous seulement dont ie ne quidoie 25  
point huimatin auoir. dame fait il ken baes uous afaire. ie uoeil fait ele  
que il soit od moi tant con ie uiurai comme celui que iou aim de tout  
mon cuer. car toutes mes pertes & de toutes mes mescheanches uai iou

\* [As the Introduction to this text presupposes the existence of an article by Dr. Sommer, "The Queste of the Holy Grail," which appears in the current volume of *Romania*, it has been deemed better to let the Introduction follow, rather than precede the text. This, together with the final instalment of the text, will be published in the January number of *Modern Philology*.—Eds.]

<sup>1</sup> "Quil ne set," repeated in MS.

plus de cou fort & il se taist atant & parole dautre chose & quant il fu eure de mangier. si mangierent moult bien & furent assis moult rice-ment. mais nule rien que agloulal uoie ne li plaist autant comme la biaute de son frere. si dist a soi meesme que mout seroit damages grans se  
 5 si biaux enfes vsoit sa vie entour sa mere. car si com il dist il ne puet estre sil est cheualiers de tel aage quil ne viegne a grant honor se diex iueut conseil metre & a che quil est de toutes pars estrais de boines gens. & sil passe lage de iouenece & il vient en la age de .xxx. ans & il nest dedens cel termene acoustumes de cheualerie ia puis niert boins cheualiers  
 10 ne preus as armes pour coi iou di que che sera trop grans damages sil nest cheualiers.

A ceste chose pensa agloulal tant comme il se sisent au mangier. & quant la table fu ostee si sala agloulal deduire en .i. iarding qui estoit deiriere le maison sa mere. & sa dame li enuoia percheual pour lui  
 15 faire compaignie. & li enfes qui il estoit moult biel & qui plus amoit la compaignie de lui que de sa mere troua agloulal gisant de sous .i. pumier si le salua moult biel si sasist iouste lui & il le recut mout deboinairement. lors li commence a demander [*fol. 152, col. b*] se il uauroit aler ala court le roi artu. pour estre cheualiers.

Certes fait percheuaus iou ne desirai onques tant rien com iou fai a  
 20 estre cheualiers sil plaisoit a nostre seignor. & se iou quidoie que vous me vaussissies mener o vous iou iroie moult uolentiers. pour estre cheualiers quant vous vous enires. voire fait agloulal si desires tant a estre cheualiers. certes il mest moult bel & iou vous imenrai moult uolen-  
 25 tiers si tost com iou me departirai de chaiens & che sera prochainement. car en nule maniere iou ne demourroie longement en cest pais. mais iou uoeil que vous de ceste cose ne parles ia. car se ma dame le sauoit ele vous feroit si pres gaitier que iamais ne uous en porries partir & li enfes dist quil nen parleroit ia a home ne a feme. iiii. iours demora laiens  
 30 agloulal si fu moult bien seruis & chier tenus de sa dame & de ses amis. El quint iour dist agloulal a percheual son frere. biaux amis que ferons nous il men couient aler le matin dites enuenres vous od moi ou vous remanres. sire fait percheuaus iou vous ai creante que iou men iroie o vous si le vous tenrai si bien que iou menirai od vous toutes les eures que  
 35 vous en vaures aler. il conuerra fait agloulal quen tel maniere le fachons que ma dame ne sen apercoiue ne autres qui chaiens soit. car sele en sauoit rien iou sai bien que de si pres vous gaiteroit que apaines enporries escaper or ne uous caut fait perceuax car iou en pensera moult bien & si vous dirai comment. quant vous seres armes & apareillies iou de-  
 40 manderai a madame congie de vous conuoier & ele le me donra mout uolentiers & lors men irai od uous en tel maniere que ia puis ne retournerai deuant cou que iou serai cheualiers. & agloulal dist que ensi le porroit il bien faire & sans nule male esparanche de nului

Cele nuit demoura laiens agloul & dist a sa mere. dame iai chaiens demoure grant pieche pour lamour de vous & si eusse plus grant mestier derrer. que de seiourner. si vous pri que vous me dones congiet par coi iou men puisse demain aler & metre a la uoie. car moult me tarde que iou viengne a la court le roi artu. car iou ni fui passe a .ii. ans ou plus. quant la mere entendit cele parole si li demanda pour coi il sen uoloit aler & il dist que faire le me couvient pour coi iou uous pri que *[fol. 152, col. c, verso]* uous me donnes congiet. car demain memetrαι iou a la uoie. car mout me tarde que iou soie a la court le roi artu. quant la mere oi chou si li doune congiet mout uolentiers mais ancois en ploura mout durement. alendemain si tost con li iours aparut biaux & clers se leua perceuaus qui mout estoit en grant esfroï de ceste cose si apareilla enteil maniere son affaire son cheual & ses armes quil ot tout prest

Quant agloul fu leues il alerent oir mese si se desieuerent & lors demanda agloul ses armes & on li aporta & quant il fu apareillies. il commanda sa mere adieu & sen parti atant & quant il fu hors percheuaus sen vint a sa mere se li dist. dame dones moi congiet de conuoier mon frere iusqua lentre du boskiel qui la ius est car iou iroie mout uolentiers & ne sai se iou le uerrai iamais. biaux flex cou dist la mere iou uous commant a dieu. mais gardes que uous ne demoures & menes od vous .i. escuier qui vous fera compaignie & pensez de tost reuenir pour mon cuer esleechier. car iamais ne serai lie deuant que iou uous reuoie. & perceuaus qui nauoit nule volente de reuenir sieut agloul son frere & sen uait od lui a la court le roi artu pour estre cheualiers comme chil qui tant ne desiroit nule rien ne ne uieult que nus aille od lui. mais la mere fist erranment monter .i. escuier & li commanda quant il fu montes quil li ramenast son enfant arriere. & il dist que si feroit il mout uolentiers.

Perceux se part de sa mere & .i. escuiers od li si cheuauchent tant en tel maniere quil ataignent agloul alentree du boskiel. & agloul estoit ales tout bielement pour atendre son frere car bien sauoit quil le sieuroit si tost comme il porroit auoir congiet de sa mere. & quant il le suit uenir il en fu mout lies. si errerent el bos & parlerent de mainte coses tant que il fu haute heure du iour & lors anuia mout alescuier. si dist a percheual. sire ralons nous ent arriere ne saues vous que uostre mere vous dist. si mait diex iou crie mout que ele ne soit a malaise. car nous ne reuenrons mais hui a court che sai iou bien. & perceuaus li dist biaux amis seufre toi vn poi & alons encore auant & chil se taist atant. & li doi frere ceuauchent iusqua heure de none & tant que ele fu passee *[fol. 152, col. d, verso]* & que il fu pres de uestres. & lors redist li escuiers a percheual. ha sire vous estes oublies si con iou quit. vous aues tant ale que nous ne venrons mie alostel de iours. lors dist perceuaus au uallet comment se diex tait quides tu que iou me soie departis de lostel ma mere pour si tost reuenir arriere. saches tu que iou ne retournerai

iamais deuant che que iou serai cheualiers nouuiaus & que iou arai este a la court le roi artu qui cheualier me fera. ains que iou reuoie ma mere si uoel que tu ten ailles arriere & di a ma mere que ele nait mie paour de moi. car iou men uois a la court le roi artu auoec mon frere. & bien li di  
 5 pour coi iou i vois. & li di que iou le uenrai ueoir si tost con iou porrai comme celi qui iou mout aim & bien le doi faire.

**Q**uant li escuiers entent ceste parole il est tant courechies que nus plus. lors commencha a plorer mout angoiseusement & dist ha<sup>7</sup> sire pour dieu que est che que vous dites ensi nel feres uous mie. si ferai  
 10 fait percheuaus che sachiez. sire fait chil. puis quil est ensi laissies ment aler od vous si uous seruirai cheualier ausi con iou ai fait damoiseil & iou lotroi fait percheuals. mais que tu ailles dire a ma dame que iou menuois auoec mon frere & quant tu auras fait cest mesage si ten uerras a la court le roi artu. se ancois ne ma consieus. & chil len merchie mout de  
 15 cest don<sup>1</sup> si se part atant de son seignour & erra tant quil vint au soir a sa dame & quant il fu descendus & il li ot dites les noueles teles comme il les sauoit. la mere qui tant amoit percheual que nule plus commencha a plourer moult durement.

**L**ors manda la dame tout maintenant son capelain si se fist confesse & rechut corpus domini si trespassa cel soir meesme & lendemain fu mise en tere. quant che fu fait si se parti li escuiers de laiens. & ceuaucha tant que il vint a vn rechet ou on haoit agloulal sor tous les homes del monde dont il avint que si tost quil seclama dagloulal que maintenant si sires le fist ochirre & ieter en vne fose & agloulal auoit  
 25 .ii. iours seiourne en vne abeie pour che que vn poi auoit este deshaities. si sen parti au plus tost quil onques pot. si li auint quil passoit deuant la maison au cheualier le iour que on auoit le uallet ochis. & si tost con percheuaus le uit il le recounut moult bien. ensi con percheuaus esgarloit le uallet issi de laiens .i. ualles & vne damoisele & il lor demanda qui le  
 30 uallet auoit ochis. & il li [*fol. 153, col. a*] dist tout maintenant que li sires du castiel lauoit ochis pour lamour dagloulal dont il se clama. & agloulal quant il entent ceste parole il relacha son hiaume & dist a percheual qui plouroit pour lamour du uallet qui mors estoit si li dist quil latente & il dist que si fera il.

**L**ors entra agloulal laiens & troua le seignour laiens qui ia estoit armes pour che que il lauoit ueu uenir. & cil qui morteument le haoit li demanda pour coi il auoit son seriant ochis. comment agloulal ies tu dont che qui mon frere ochesis. que quil ait este de ton frere fait il iou te desfi. & sui agloulal. lors descendi tout maintenant & traist lespee &  
 40 li court sus & cil refait tout autre tel. si dura tant la bataille que li sires de laiens ne le pot souffrir si uait guenchissant cha & la & chil qui morteument le haoit le fiert si durement que pour escu ne pour hiaume ne remaint quil ne li enbate lespee iusquen la ceruele. & quant chil de

<sup>1</sup>MS, "dom."

laiens uirrent lor seignor mort il sen uont fuiant li uns cha & li autres la comme chil qui ont grant paour que agloulal ne les ochie. & quant agloulal uoit que il est mors. il le traine hors de laiens & le rue en vne fosse puis se remet en son chemin. quant perceuax fu montes & il ot pris son uallet qui mors estoit il le toursa sour son cheual deuant lui. 5

**A** tant se partent de laiens & enportent le uallet. qui mors estoit iusqua la premiere abeie que il trouerent si le fissent metre en tere tout maintenant puis se misent a la uoie & cheuaucent tant par lor iournees que il virrent a cardeul en gales. & li rois artus tint illeuc sa court le iour de la tousains. & tuit li compaignon de la table reonde de la 10 queste estoient uenu laiens dolant & courechie fors que seulement li .iiij. cousin. mais il nauoient rien trouue. quant li rois les uit il en fu mout lies & dist quil deuoient bien repairier car lonc tans auoit que il ne les auoit mais ueus. lors se regarde & uit les .xx. compaignons qui sestoient parti de court. quant il orent mangie il conterent lor auentures qui lor 15 estoient auenues mais onques ni ot celui qui nouuieles seust adire de lancelet. dont li rois fu mout courechies & tout li baron. mais sour tous chiaus qui i estoient en pesa il a la roine. car bien sauoit que tous li maus que lancelet auoit estoit par lui si nen set que faire & nest nus aqui ele lost dire si en quide bien morir de doeul 20

**A** len demain que agloulal vint acourt regarda<sup>1</sup> [*fol. 153, col. b*] li rois en mi le palais si uit agloulal & perceual qui seruoit as tables si demanda li rois qui il estoit & on li dist. & il dist que diex li doinst boine auenture que mout estoit biaux. quant il orent mangie si vint agloulal deval le roi & li dist sire li enfes dont uous parlastes est mes freres si le vous amaine 25 pour faire cheualier car iou quit quil sera pseudom. certes fait li rois uous aues mout bien fait & boin gre uous en sai. & iou le ferai mout uolentiers quant il vous plaira. & perceuaus li dist lors. sire dont uous pri iou que che soit demain. de par dieu soit che dist li rois. cele nuit ueilla percheuaus a la maistre eglise de cardoeul & alendemain le fist li rois 30 cheualiers quant il fu heure de disner li rois vint el palais pour mangier. si sasissent li compaignon de la table reonde en lor sieges. & percheuaus sassist as tables auoc les moiens cheualiers & qui estoient mains renome. & quant il fu assis si uint deuant lui une damoisele la plus biele du monde mais onques nauoit parle. si lapieloient chil de laiens la damoisele 35

**Q**ui onques ne menti & tout la connissoient par cest nom. Quant la damoisele lot regarde vne grant pieche si commencha aplourer mout durement & lors en auint vne merueilleuse auenture qui fu tenue a miracle & si dut ele bien estre. car cele qui onques nauoit parle dist a percheual. perceual serians ihesucrist uirges & nes. vient ent seoir a la 40 table reonde iouste le lieu perilleus. & chil qui chou oient enfurent tout esbahi. adont le prist ele par la main & len mena au siege perillux & lasist a destre partie si li dist tout maintenant. en cest siege serra li boins

<sup>1</sup> MS, "regarrrda."

cheualiers & tu serras les lui a destre pour chou que tu le resambleras de virginite. & a senestre serra boors si saront bien li cheualier de chaiens la senefianche de ceste cose.

5 **Q**uant ele ot che fait ele dist biaux amis souuiegne vous de moi quant vous venres deuant le saint graal si proies pour moi car ie trespasserai de cest sieucle. atant sen part si vint es chambres la roine si se coucha ne onques puis ne parla fors au quart iour seulement que on li aporta corpuis domini. & quant ele le vit si dist. biaux sire dieux merchi ne onques plus ne dist. ains trespassa ains tost comme ele ot rechet son  
10 sauueour. si le tinrent a grant merueille chil de laiens comment che pooit estre auenu. si fisent si grant honor au cors [*fol. 153, col. c, verso*] con on deuoit faire a feme de son lignage si la misent en la maistre eglise de tintaguel moult hounourablement.

15 **Q**uant la damoisele fu enterree si misent cele auenture en escrit pour cou que cil la ramenteuroient qui apres lor mort uenroient si retinrent o eus perceual si li fisent moult grant hounour & disent quil seroit de la table reonde & seroit auant mis pour les auentures metre afin. & le fisent remanoir ou il uausist ou non. mais plus volentiers fust ales querre lancelet. quant il oi parler de sa cheualerie quil ne fust remes laiens.  
20 mais agloulal & li autre compaignon le detinrent en tel maniere que li contes ne dist mie quil se fust meus acel point ains fust demoures mout grant pieche se ne fust vne parole qui li fu dite. si vous dirai quele.

**V**n iour auint que li rois seiornoit ataradigant son castiel si sasist au disner. si seoient deuant lui ne sai quant cheualier & par deuant lui  
25 seruoient .iiii. cheualier qui estoient de diuers aages. li uns de .xxiii. ans & li autres de .xl. li tiers de .xxiiii. ans & des plus iouenes estoit perceuaus & auoit la chiere simple. & kex li seneseaus qui longement lauoit regarde le moustre amordret si li demande quil len samble & il dist quil est boins cheualiers & quil aime miex pais que guerre. certes fait kex si fait il au  
30 mien ensiant. il pert bien a son escu que onques ni ot coup feru. ceste parole oi uns faus de la court qui dist a perceual que il ne deust mie seoir entre cheualiers. or me di fait perceuaus comment le ses tu. enon-dieu fait cil chil de chaiens dient que en uostre escu not onques coup feru. de cou oit percheuaus trop grant honte si li demande qui sont chil  
35 qui ce ont dit & il ne li set dire fors tant que il sont cheualier de la table reonde & ne pourquant il li mostre keu & mordret & il croit bien que che soient il qui ont ceste parole dite. si pense que acourt ne remanra il mie. ains enterra en la queste de lancelet. ne iamais ne retournera deuant chou que il sara nouieles de sa vie ou de sa mort se li est auis que che  
40 sera grans honors se il muert en la queste de si preudoume comme lance-

lot a este.

**A** ceste cose pense mout longement percheual au soir. quant agloulal fu couchies vint percheual a .i. sien [*fol. 153, col. d, verso*] escuier & li

dist que il li apareillast ses armes & son cheual. si mait diex fait li ualles iou seroie mors & hounis se iou en ceste sale demouroie apres uous car uostre frere moehirroit. mais sil uous plaisoit que iou alaisse od uous iou le uous apareilleroie maintenant. ua dont tost fait perceuaus car moult me tarde que tu aies fait. quant percheuaus fu armes il monte entre lui & son escuier. & prent son escu & son glaue & se partent de laiens. & quant il sont hors du castiel il se metent au chemin si cheuauchierent tant que il virrent en la forest. & quant il ont bien ceuauchie .x. lieues engleskes si trouerent vne maison qui estoit uielle & gaste & anchiene. lors dist perceuaus a lescuier quil auoit grant talent de dormir. sire fait li escuiers or uous reposez & iou vous garderai iusqual iour. & perceuaus

**L** li dist lors ains dormiras ausi en as tu mestier  
 lors li dist perceuaus quil atachast les cheuax & sen dormi. quant percheuaus uoit cil<sup>1</sup> qui est ensi endormis il pense que iamais nel porra miex laisser apoint. car il na plus affaire de sa compaignie. car che quil fera des ore mais ueut il faire si celeement que nus ne le sache comme chil qui bee auenir a mout grant renommee. lors monta sour son cheual & lascia son escuier dormant & erra tant que il vint hors de la forest. au matin commença a plouuoir & affaire mout lait tans & iuers estoit ia entres si dura chis lais tans iusqua prime. & lors se regarda si uit .i. chastel deuant lui qui seoit sour vne yauwe qui mout estoit grande & pereilleuse. & percheuaus se regarde si vit sour le pont vn cheualier qui estoit armes & estoit loies dune chaine de fer parmi le uentre si fort que cestoit merueille si fu la chaine atachie a vn perron par deuers le chastiel. & quant chil a la kaine uoit uenir percheuaus uers le perron & uers le castiel. il li dist ha<sup>~</sup> por dieu se tu ies cheualiers de la maison le roi artu ou cheualiers auentureus si me uien ieter de chi & tu le dois bien faire car ausi sui iou cheualiers comme tu ies

**Q**uant percheual uoit le cheualier il uait cele part & li dist que de ce ne li faura il mie si li demande comment il li porra aidier. en on dieu fait il se vous auies si boine espee que uous peussies ceste chaine trenchier iou seroie deliures & autrement non. & il dist que ia pour espee ne remanra sele deuoit brisier en .ii. piechies. lors le fist li cheualiers aprochier du pont & il li demande comment il la porra trenchier enon dieu fait il res ares de uostre hauberch. car se [fol. 154, col. a] autrement le faisies uous series enchaines. chil se couche maintenant & chil trait lespee & fiert sour le chaine & sour le perron en teil maniere quil caupa deuant lui & le chaine & le hauberch & pour .i. poi quil nafola le cheualier & fu deuant lui tout decoupe ausi comme vns monchiaus de terre.

**Q**uant li cheualiers uit tel coup il se seigna puis dist. errant au ferir ne resambles mie hom mais anemis. mais iou quit que uous aues uostre espee quassee. & il dist que il quide bien que il die uoir. lors le drece

<sup>1</sup> "uoit cil" not in MS.



- contremont si le troeue saine & entiere. si en fu mout lies car il laime ore miex que deuant lors uit du castiel issir vn cheualier arme dunes mout boines armes. & quant percheuaus le uoit uenir il point contre lui & l'aconsieus alentree dune des portes qui estoient sour le pont si le fiert si durement que il le porte a tere en liauwe tout enuers. si fust noies sans faite. mais il se prist a vne nacele qui en liaue estoit. & percheuaus prent le cheual & le done au cheualier que il auoit deliure & li dist que il montast desus. car il le menra a sauueite se il puet & chil monte si ne retournerent mie uers le castel ains sen uont dautre part.
- 10 **L**ors li demande percheuaus comment il auoit este enchaines. & chil li dist. sire fait il. il mauint auant ier que iou ceuauchioie auentures querant tant quauenture & fortune mamena cha. & quant iou fu illeuc herbergies la dame me uit biel che li fu auis quele me requist damors & iou li dis que iou nen feroie rien se ele ne sen uenoit od moi. & ele le me
- 15 creanta. si auint que quant nous issismes de laiens & nous nous enpartesimes pour aler el roiaume de logres. & chil qui laiens estoient nous prisent & nous ramenerent arriere. si misent la dame es aniaus & moi loierent si con uous ueistes si disent que ia amangier ne mi donroient ne ni mourroie se de faim non. & iou imouruisse uoirement se dieux ne vous
- 20 eust ceste part amene pour moi aidier. or vous ai di pour coi. or me dites biaux amis fait percheual comment aues vous non. & chil dist quil li dira moult uolentiers. sire fait il iou sui de la table reonde & sui nies le roi baudemagu & iai non patrides. sire fait patrides estes vous des cheualiers de la table reonde. oil fait il uoirement ensui iou si li deuisse comment il
- 25 **O** le fu  
Or me dites fait il comment aues vous non. on mapiele fait il percheual & sui freres agloulal [*fol. 154, col. b*] & pour coi fait patrides uous partesistes vous de court en yuer & il li dist maintenant que kiex & mordres len fisent partir par vne parole que il disent si li conta quele. Tant ont
- 30 erre quil virrent au rechet dun cheualier. quant il furent pres patrides dist a son compaignon. sire descendes car chi seres uous herbergies pour lamour de moi & pour che que deserui laues & il dist quil ne descenderoit pas. sire fait patrides si feres car vous ne mangastes hui & il en est bien tans si comme hom qui hui ne mania si len pria tant que il descendi.
- 35 **Q**uant chil de laiens counurent patrides il li fisent moult grant ioie. & moult honorerent percheual pour lamour de lui. quant il orent mangie si demande percheuaus a patrides sil iroit point a la court le roi artu. oil fait il se dieu plaist. or uous proi iou dont fait il que uous me salues mon frere agloulal & li dites que il ne me quire mie. car iou me
- 40 sui partis de court pour oir noueles deancelot. & il dist que cest mesage fera il bien. lors sen parti patrides & entra en son chemin & erra tant par ses iornees que il vint a la court le roi artu. si le salua de par perceual & li dist tout cou que il li a uoit dit & pour coi il sestoit partis de court.

quant li rois sot quil sen estoit ensi ales de cort il en sot mout maigre a keu & a mordret. seignor uous maués tolu le meillour cheualier de chaiens fors Gauaine mon neveu. & sachiez que li cheualiers uenra a plus grant honor que uous ne quidies. & pour chou me poise il que il se part dechaiens deuant chou que il fust plus fors & plus durs. car des ore mais li conuenra plus souffrir paines & trauaus qua son aage napartenist. mais atant laist ore li contes a parler daus tos & retourne a percheual & a hestor des mares.

**O**r dist li contes chi endroit & la uraie estoire le tesmoingne que tant cheuaucha percheuax par maintes iournees esprouant soi quil li auint si bien que onques ne troua cheualier dont il ne uenist audeseure & si estoit mout acoustumes doir messe & matines cascun iour & se tenoit castement & se confessoit cascune semaine & mena tel uie tant quil ot bien erre .i. an entier. & en chel tempore ot fait des plus bieles cheualeries del monde & fu de lui mout grant renomee [*fol. 154, col. c, verso*] & plus en la court le roi artu que en autre lieu car illeuques uenoient toutes les nouieles des pseudomes.

**Q**uant perceuaus ot bien erre .i. an en tel maniere si li auint .i. iour quil encontra hector des mares a lentrete dune forest qui tex estoit atournes que toutes ses armes ne ualoient se petit non car ses escus estoit si depechies quil ni paroit se troucus non & ses hiaumes estoit si desfroissies & il estoit mout traueillies & che nestoit mie merueille. car il auoit cheuaucie .ii. ans tous entiers sans auoir point de repos. se cheuauchoit mout pensant & mout li anuoit. car il ne pooit riens trouuer dont il se reconfortast & ne pooit oir nouieles de lancelet son frere. si en estoit mout dolans si que il ne quidoit iamais auoir ioie. & quant il sentraprochierent il ne sentrecounurent point. car onques mais ne sestoient entreueu. il enbrachierent les escus & fisent samblant de iouster. il orent boins glaiues & fors. si sentrefierent si durement es grans aleures des cheuaus que onques lor hauberch ne lor furent garant quil ne sen feissent sentir les fers des glaiues es cars nues. mais il nauoient plaies dont il ne peussent bien garir & hector qui plus biax ioustoit que nus cheualiers porta percheuaus a tere par desur la crupe du cheual. puis prent le cheual & latache a vn arbre. & perceuaus qui mout fu courechies de cest encontre car puis que il fu cheualiers ne trouua mais cheualier qui la siele li peust faire widier. lors trait lespee du fuerre & enbrache lescu & sapareilla de moustrer sa uertu & sa proueche car il a trouue cou li est auis .i. boin cheulier si li court sus tout maintenant. & chil qui de cel mestier nestoit mie aprentis & qui acoustume lauot des enfanche li done parmi le hiaume si grant coup comme il puet amener contreual. & percheuaus qui mout angoiseusement feroit quanquil ataignoit & nestoit mie si traueillies comme hector. hauche le branc dachier & li paie teus

**L**.iii. coups que mout fu chil greues du rechevoir car moult furent greues.

Lors commença la mellee si grans entreus que nus ne les ueist qui ne les tenist a pseudomes. [*fol. 154, col. d, verso*] si sen esmerueillâ  
 5 mout cascuns de la proee quil trouua en son compaignon. car hector ne quidast iamais trouer tant de proueche en perceual & percheuaus ne quidast iamais trouuer auteil cheualier comme hector li samble. & pour chou ni a il celui qui nait paour de la teste perdre. & ne pourquant il se desfendent mout bien andui & se ceurent de lor escus pour les cols de lor  
 10 espees qui estoient trenchans. si enfont le sanc uoler de toutes pars si dura tant la bataille quil ni a celui deus .ii. qui nait teus .x. plaies el cors que uns autres cheualiers en quidast bien mourir de la menor. si pert bien a la tere par ou il passent qui toute estoit couuerte de pieches descus & de mailles de hauberc & del sanc de lor cors que sil ne fuissent de si  
 15 grant forche il fuissent piecha mort au grant travail quil ont souffert. mais li grans desiriers que cascuns a de lui uengier. a cou quil estoient ausi comme naure amort les a teus menes que il nel sentent mais. mais tant ont endure que petit peuvent mais lor coup ualoir. & quant il se quident entreferir si leur tournent les espees es mains mais il ni auoit  
 20 celui qui deist mot pour cose qui li auenist. si maintinrent tant la bataille que par fine force les couuint reposer & traire arriere li uns cha & li autres la. si lor couuint reprendre lor alaines & lor forches qui lor faloient

**Q**uant il se sont grant pieche regarde. si dist percheuaus a hector dites moi qui uous estes sire cheualiers iou le uauoie mout uolentiers  
 25 sauoir. car onques en ma vie ne trouuai ausi pseudome comme uous estes ne que iou autant doutasse car a che maues mene ou onques cheualiers ne me mena. certes sire fait hector ausi aues vous fait moi. car uous maues si court tenu que iou nen puis escaper sans mort par coi iou di que uous estes li mieudres cheualiers que iou onques trouuasse passe a .iii. ans  
 30 si uous porres bien uanter quant uous maures mort que uous aures mort hector des mares qui est compains de la table reonde & frere mon seignor lancelet du lac. ha sire pour dieu merchi puis que uous estes compains de la table reonde iou ai trop mesfait uers uous car ausi ensi en sui iou compains par coi iou ne me deusse estre combatus a uous en nule maniere & de cest  
 35 mesfait vous cri iou merchi. car se iou quidaisse que de cel ostel fuissies ia ne mi fuisse combatus en nule maniere [*fol. 155, col. a*] comment fait hector estes uous compains de la table reonde. sire oil & comment aues uous non. on mapiele fait il percheual & sui freres agloul. ha sire con grant mesaventure a chi pour poi que nous ne nous sommes entochis. sire fait  
 40 percheuaus se uous uous plaingnies de moi encor me plaing iou plus de uous. car uous maues ochis & bien en porres sauoir le uoir.

**E**nsi se plaint li uns de lautre si ont mout grant pitie deus meemes quant il se uoient que de plaies que de sanc teus atournes quil ne

quident ia la nuit ueoir. & hector osta son hiaume de sa teste teus comme il estoit. lors se coucha sour son escu & commencha adire tout enplourant. ha sire lancelot. iamaiz ne me uerres. hui faura la compaignie de moi & de uous. grant pechie fist ma dame la roine qui uous cacha de court car pour uous morront maint preudome & iou meesmes en morrai 5 qui mout vous desirroie a ueoir & a trouuer sour tous homes & ce nestoit mie merueille car plus procains uous estoie iou que nus. entrementes quil parloient ensi se regarda percheuaus & uit hector qui tant auoit perdu del sanc quil ne se pooit<sup>1</sup> soustenir si nest mie mains dolans destor pour lui meesme. quant percheuaus ot grant pieche ieu a tere il dist 10 a hector sire uous maues<sup>1</sup> mort & diex le uous pardoinst & iou si fais. car se diex mait iou ne uous en sai nul mal gre puis que vous laues fait par mescounisanche. mais dites moi comment il uous est. par mon chief dist hector iou ne quit mie uiure iusca la nuit. car tant ai petites plaies & grans que iou nen puis escaper sans mort si me poise moult de moi & de 15 uous. car onques mais cheualier qui deussent estre ami ne moururent en tel maniere car par la compaignie de la table reonde deussons nous estre ausi comme frere.

**E**n tel maniere<sup>2</sup> iurent li uns cha & li autres la iusca heure de vespres. & lors dist hector a percheual. sire montes sour uostre cheual & ales 20 chi pres a destre en ceste forest ou uous troueres vn hermite & li direz que il nous viegne veoir & aport od lui nostre sauueour. car onques mais iou noi tel paour con iai maintenant. si mait diex dist percheuaus iou nen ai pooir. car iou ne quit mie que iamaiz puisse monter sour cheual. ensi furent li dui cheualier ensamble tant que la nuit uint noire & obscure 25 fu li tans si oscurchis. que nus ne pot ueoir lautre. & hector dist a percheual iou me muir pour dieu se vous poes iamaiz uenir a [*fol. 155, col. b*] court & uous uees lancelot mon frere si le me salues. mais de conter ma mort ne ma mesceanche ne uous caille car il uous ensaroit malgre & atort & il dist que de cel message faire nara il iamaiz lisir. car il ne quide 30 iamaiz ueir le iour de demain

**A**i cel point quil estoient en teil peril que il quidoient bien mourir virront uers eus uenir vne clarte mout grande qui sour aus descendi si sesmerueillierent mout que ce pot estre. lors se regarderent & virrent uenir .i. uaissiel<sup>3</sup> qui estoit fais en samblance de galice qui fu couuers 35 dun blanc samit & deuant uenoient doi encensier & doi autre le sieuoient apres. mais il ne ueoient mie qui les encensiers portoient ne qui le uaisiel soustenoit. & ne pourquant che leur sambloit sainte cose si iespererent tant de bien quil lenclinent parmi toutes les angoisses quil sentoient. & maintenant lor auint vne si bele auenture quil se sentirent sain & haitie & 40 gari de toutes lor plaies que il auoient eues. apres ne demoura gaires que li sains uaissiaus sen parti si soudainement que il ne sorent quil fu deuenus.

<sup>1</sup> Small holes in MS.<sup>2</sup> MS has "manierent."<sup>3</sup> MS "uailliel."

Au chief de pieche parla percheual. & dist a hector aues vous che veu.  
 oil uoir<sup>1</sup> fait il uoirement lai iou ueu mais iou ne sai mie bien que  
 che est. & nepourquant si tost comme il fu uenus entour nous fui iou  
 garis des plaies que vous mauies faites si que iou sui ausi sains & ausi  
 5 haities con iou fui onques. par foi fait percheual. tout ensi uous puis iou  
 dire demoi car vous ne me feistes hui plaie dont iou ne soie garis. enon-  
 dieu uoirement nous a diex secourus par sa grace. & par sa pitie. car  
 autrement neussions mie ueu le iour de demain. or poons nos bien dire  
 que nostre sires a eu pitie de nous quant il nous a enuoie nostre garison  
 10 par si bieles auenture.

L'ongement parlerent ensamble de ceste cose si demanda li uns alautre  
 de ceste cose que che pooit estre quil auoient ueu deuant eus. certes  
 fait percheuaus iou endroit de moi ne puis sauoir que cest. & iou le uos  
 dirai fait hector puis que vous ne le saues. sacies uraument que chou a  
 15 este li sains graaus. si est li uaissiaus ou nostre sires manga laigniel le  
 iour de paskes auoec les disciples en [*fol. 155, col. c, verso*] la maison  
 symon le liepreus. lors li conta comment iosep dabarimachie lauoit aporte  
 el roiaume de logres si en a on puis ueu teus miracles que par la grace  
 de nostre seignor en ont este repeu si oir & encore en sont cascun iour le  
 20 maisnie le roi pelles & seront tous iours tant comme il seiorneront en cest  
 pais.

Par dieu me sire hector vous me contes merueilles fait percheual. & iou  
 croi bien que che soit uoirs par la uertu de nostre seignor qui a este  
 prouuee sour nous vous di iou que iamais ne serai aaise deuant que iou  
 25 la uoie se hom morteus le puet ueoir. lors rendent graces & merchis a  
 nostre seignour de cou que si biau miracle lor auoit fait si atendirent  
 illeuc iusqual iour. au matin quant il virrent le iour se leuerent en estant  
 & salerent entrebaisier si fianchierent li uns alautre que iamais li uns  
 alautre ne fauroit ains seroient compaignon puis que ensamble ont este  
 30 sane. si prennent lor armes teles comme eles estoient. car toutes uois  
 ualoient il miex que sil fuissent desarme si quierent tant lor cheuax que  
 il les treuuent. quant il furent monte si dist percheuaus que ferons nous.  
 che quil uous plaira fait hector. iou queroie fait il mon seignour<sup>1</sup> lance-  
 lot. mon frere que iou ne vi .ii. ans a passes. ne encore nen puis iou oir  
 35 nouuieles si en sui mout dolans car il estoit li mieudres cheualiers du  
 monde & li plus biaux. comment fait percheual nen oistes uous puis  
 parler certes fait hector nenil si ai iou plus grant fianche en sa vie que  
 en sa mort car sil fust mors il ne peust estre que nous nen oissons aucu-  
 nes nouuieles. ore alons donc fait percheuaus andui ensamble pour sauoir  
 40 se diex nous menroit ou nous en oissons nouuieles. si se metent andoi  
 ensamble au chemin. mais atant se taist ore li contes daus .ii. & retourne<sup>2</sup>  
 a parler de mon seignor lancelet du lac

<sup>1</sup>Small holes in MS.<sup>2</sup>MS retourner.

**O**r dist li contes que quant lancelet se fu a che uenus quil ot del tout perdu le sens & le memore quil soloit auoir entel maniere quil ne sauoit quil faisoit ne ou il aloit si erra tant si nus comme il se parti de camaalot mainte iournee lune heure auant & lautre arriere si comme auenture le portoit [*fol. 155, col. d, verso*] si fu en poi deure tains du soleil & du halle & fu mout enpiries de ce que tant se traueilloit & petit mangoit si fu teus atournes ains que li premiers yuers fust passes quil nestoit hom qui deuant leust ueu qui le recouneust sil ne lauisast mout bien. vn iour diuer quil faisoit moult froit auint que auenture amena lancelet en braies & en chemise tous depechies a .ii. paueillons qui estoient tendu en vne prairie & en cel paueillon gisoit uns cheualiers & vne damoisele. deuant cel paueillon pendoit uns escus & .ii. glaives iauoit apoies & .ii. espees. il vint cele part & prent une des espees & le sache du fuerre puis commenche a ferir grans couls sour lescu & fist autel noise con se vint cheualier combattissent ensamble si depeche lescu & lenpire mout durement.

**A**cele noise & a cele tempeste que lancelet faisoit issi du paueillon vns nains & quant il voit celui qui depeche lescu il li uoloit lespee oster des mains car il ne quidoit mie que il fust si hors du sens comme il estoit il vint uers lui & laiert par le poing & le sache au plus roidement que il pot. mais<sup>1</sup> onques pour pooir que il eust ne li pot oster du poing. & chil qui estoit hors<sup>1</sup> du sens se coureche & le prent par les espaules & le iete ensus de lui si felenesement que a poi quil ne li a le col brise mais plus de mal ne li fist & puis recommenche a ferir sour lescu si comme il auoit fait deuant. quant li nains fu flatis contre terre il ot si grant paour quil commencha a crier aide aide. si ne demoura gaires que de laiens issi vns cheualiers cauchies dunes heuses & uestus dune reube descarlade fourree mout ricement. & quant il uoit son nain il li demande que il a. sire dist li nains apoi que chil dyable ne ma tue. lors regarde li cheualiers lancelet qui se conbatoit a lescu & le uoit si mal atourne & si maluaisement uestu quil set bien quil nest mie bien en son sens. car il aloit nus en chemise ausi con sil fust plains estes.

**L**ors pensa li cheualiers que mout seroit grans aumosne qui le porroit faire reposer pour sauoir sil porroit uenir en son droit sens. lors senuait uers lui por lui oster lespee del poing. & lancelet commencha acrier sire cheualiers ne uenes mie auant mais laissies moi ma bataille car si mait diex se vous vous en entremetes iou uous ochirrai. lors hauche [*fol. 156, col. a*] lespee pour lui ferir. & quant chil le uoit il se tint arriere & sen uait a son paueillon & prent ses armes & sen reuint a lancelet. & li dist lors que il mesist ius lespee si imist sa main pour lui tolir. & lancelet hauce lespee si tost comme il le uit uenir pres de lui si le fiert si malement que lespee uole en .ii. pieces. & chil est si estourdis

<sup>1</sup> Small holes in MS.

quil chiet a tere teus atournes du coup que la ceruele li est toute tourblee en la teste. &ancelot le lascia gisant si entra el pauillon & trouua la damoisele qui ia estoit esueillie. quant ele le uit uenir si uit que il estoit hors du sens. lors seseria si haut comme ele pot & ist du lit toute nue  
 5 en sa chemise & ua hors du pauillon &ancelot entra tantost ou lit. si le troue caut & boin si li fu auis achou quil auoit eu froit que il fust aaise si se coucha & couuri moult bien. & cele qui fu hors saillie troua son ami gisant a terre si quida bien quil fust mors si ses cria & dist. ha<sup>7</sup> lasse morte sui. lors commencha a faire le plus grant doeul du monde.

10 **A**u chief de pieche reuint chil destourdison & se drecha en estant & ouri ses iex. & quant il ot celi qui ensi se dolisoit. il se blasme mout & demande ou chil iert qui ensi lauot atourne. ha<sup>7</sup> sire fait li nains pour coi le demandes uous pour dieu ne li faites nul mal. car che seroit mout grans pechies car il est fols & hors du sens. enondieu fait il  
 15 ia se dieu plaist mal ne li ferai ains le retenrai od moi se dieu plaist tant que il sera garis & respasses. & se iou le pooie faire iou en seroie seruis & hounoures de plusours gens. si naurai iamais ioie deuant cou que iou laurai mis en son droit sens. parfoi sire fait la damoisele il est en cest pauillon. & cil se drece maintenant & uait cele part. & quant il vint a  
 20 lentrete del pauillon si vitancelot. qui sestoit couchies el lit & dormoit mout fermement comme chil qui mout estoit traueillies si fu li preudom mout lies quant il le uit a repos. si entra ens tout bielement & prist la robe a la damoisele si laporta fors puis dist au nain. la si monte sour ton ronchin & si ten ua erranment au castiel si di amon frere que il viegne  
 25 parler amoi & si nel laist pas & chil fait son comandement. si monta & se haste de tost aler tant que il vint au rechet au cheualier si fist son

**L**message & cil prist ses armes & sen vint a son frere  
 Li cheualiers qui uoloit tenirancelot auoit non [fol. 156, col. b] bliers & li autres estoit apieles celians si estoient boin cheualier & de haut  
 30 afaire.

**Q**uant celians fu uenus se li dist bliers biaux frere iou vous ai mande pour une des plus bieles auentures del monde qui mest auenue si li conta comment vns hom hors du sens est cele part uenus el plus pource habit du monde si sest grant pieche conbatus a mon escu. & quant iou li  
 35 courus<sup>1</sup> sus pour lescu tolr il me donna si grant coup sour mon hiaume que onques puis que iou fui cheualiers ne rechui si grant pour<sup>2</sup> nul home & pour chou uous mandai iou pour moi conseillier que iou en porroie faire car iou le uoel tenir od moi tant quil ait sante en aucune maniere parfoi biau frere iou ne vous en sai conseillier. car qui de sa sante se uaueroit  
 40 entrementre il le couuerroit metre en .i. lieu en recoi & loing de gent ou il neust nule lumiere enondieu fait bliers se nous peussons tant faire que nous leussons en uostre fortereche ou en la moie si le porrons bien

<sup>1</sup> MS "courut."<sup>2</sup> ? "par."

porter. or pensons que il isoit portes se il puet estre. lors entrent el pauillon si uoient lancelet qui encore dormoit mout fortment. comme chil qui mais piecha nauoit eu tant de repos. quant il uoient chou si dient que il le lieront el lit de cordes & de caines si quil ne se porra remouuoir deuant che que il sesueillera.

5

**E**nsi comme il le disent le fisent car il le lierent si fort que apaines en peust nus hom escaper sil ne fust de trop grant pooir. & quant il orent che fait si manderent escuiers & serians & dient que il lenporteront en la foretece bliant. & chil sen uont atout le lit & il dormoit mout coieient car mout auoit eus de maus. quant il fu uenus a repos si dormi si fermement quil ne sesueilla onques deuant che quil fu uenus al rechet. mais en che quil fu mis atere sesueilla & ouuri ses iex & se uaut deslier mais che ne pot estre. & chil li deslient les mains puis li donent amangier & il manga comme chil qui piecha nauoit eu se mal non. si le tint blians entel maniere tout le remanant deliuer auoec lui. mais onques pour cose que il peust faire ne pot uenir agarison & nepourquant il lor sambla tant paisieubles que il li quisent reube riche & le laisierent ensi aler entreus en tel maniere que il niert point enprisonnes fors duns petis aneles que il li [*fol. 156, col. c, verso*] li misent es poins & es pies pour chou que il nalast mie loing. ensi amenda mout en cel terme & reuint auques en sa biaute mais onques ne uint nus laiens qui connoistre le peust & nepourquant disoient quil sambloit quil eust este mout boins cheualiers si estoient mout dolant de sa maladie que il ne len pooient trouuer garison. ensi fu lancelet laiens iusqua leste & tant que li estes fu hors iusquen uers le noel ne ia a cel point ne se fust remues se ne fust une auenture qui auint si uous dirai quele.

15

20

25

**V**n iour quil faisoit froit leua blians par matin & ot prises ses armes & fu montes sour son cheual & se parti de son chastiel ensi armes comme il estoit & baoit a aler en la forest qui pres dilleuc estoit pour iouste querre pour sauoir sil trouueroit aucun cheualier ou priue ou estrange & il estoit acoustumes de che comme chil qui estoit uns des meillours cheualiers du pais. & quant il fu un petit eslongies il trouua .ii. cheualiers freres qui ne estoient du pais & le haoient morteument. & quant il le uoient seul il li escrient quil estoit mors si laissent courre tant con cheual peuent courre. & blians qui mout estoit preudons ne faisoit mie sanblant de fuir ains les atent & chil brisent lor lanches sour lui. mais de la sele nel remuent & il enfiert .i. si durement quil li brise son glaiue contre son pis. mais autre mal ne li fait.

30

35

**C**il passent outre & traient les espees & li courent sus & il se desfent & se cœure de son escu & lor doune grans couls. mais cil doi furent boin cheualier. & sentraident comme frere de si grant force que il li couuint place guerpir ou mourir maintenant & ce ne fu mie merueille sil lor tourna le dos car il lauoient naure en plusours lieux & tant a perdu

40



du sanc que mout fu afebloies. quant il uoient que il sest mis a la fuie si  
 commencent acrier hai ⁊ cuuers ni garires ia uostre fuie ne uous uaura.  
 mais chil qui estoit sour .i. fort cheual sescapa mout bien de lor mains si  
 quil nel poient onques baillier ains sen fui a son rechet. si ne trouua qui  
 5 aidier li peust & chil qui pour occhirre le sieuoient entre [*fol. 156, col. d,*  
*verso*] rent apres lui. & tant quil virrent en vne chambre ou lancelet  
 gisoit tous uestus & se fierent sour celui que il cachoient & quant il uoit  
 quil ne pooit garir il met main a lespee & sapareille de lui desfendre  
 comme chil quine se laira pas occirre tant comme il se puist desfendre &  
 10 chil qui mout sont lie quant il le uoient laiens & ni uoient home qui li puist  
 aidier & uoient quil sont doi & il est tous seus il viennent alui & lassalent  
 & il se desfent tant comme il puet. mais tant auoit este greues a lautre  
 assaut que moult auoit perdu de sa forche si a grant paour quil ne lochient.  
 15 **Q**uant lancelet uoit la mellee commenchie deuant lui tous fuist il hors  
 du sens & fox si connut il bien bliant qui maint bien li auoit fait &  
 bien set quil le uoient occirre si en est tant courechies que il uaut  
 saillir en pies pour lui aidier. quant il uit que li aniel de ses pies le  
 blechoient il sareste mout courechies & prent les aniaus a .ii. mains & les  
 tire de toute sa forche si quil les. deront & en deliure ses pies. mais il en  
 20 a les mains toutes sanglentes & le quir de ses dois tout deronpu<sup>1</sup> quil ot  
 fait. & quant il ot les aniaus rompus il not mie tant de sens que il pre-  
 sist espee ne escu dont il se peust garandir car en la chambre en auoit a  
 plente. ains court tous desarmes a vn des cheualiers & le prent par le  
 hiaume & le tire si fort alui que il labat contre tere si lahert au poing si  
 25 li<sup>2</sup> tout lespee & len done .i. grant coup par mi le hiaume & lochist puis  
 court sus alautre & le fiert si durement que armeure nule quil eust nel  
 garandist quil ne li mete lespee iusca la char. & quant chil le uit uenir  
 il sesmerueilla mout durement dont che pooit estre uenu. & nepourquant  
 pour che que il feru lauoit il sen uoloit uengier. si hauche lespee por lui  
 30 ferir parmi la teste mais blians ne li laisse mie. ains hauche lespee & li  
 coupe le brach. & quant chil se uoit si mal mene il tourne enfuies. &  
 lautres que lancelet auoit abatu quant il uoit la desconfiture tournee  
 sour eus il se fiert en la chambre & prent son cheual & monte & ausi fist  
 ses freres. car paour ont de pis auoir si senuont por lor vies garandir &  
 35 lancelet remaint laiens & se couche en son lit. & blians qui mout iert  
 dolans de ceste auenture se desarme quant il uoit que il sen estoient ale.  
 si atent tant que li seriant viennent [*fol. 157, col. a*] qui encore ne sauoient  
 rien de ceste auenture ne rien nen dist laiens deuant le soir que ses freres  
 vint. il fist cele nuit lancelet mangier od lui. en ce quil seioient au mangier  
 40 celinans regarde & uit la nape toute sanglente du sanc qui des mains  
 lancelet issoit comme chil qui auoit le cuir de ses mains tout deronpu. si  
 le moustre a bliant uees biaux frere con uostre ostes a les mains derompues

1? "de cou" omitted.

2? "esrache" or "coupe" omitted.

C & saine mout malement grant pechie fist qui si estroitement le lia. Certes fait blians iou ne men merueil mie car onques mais ne vi a home deshaitie tant faire comme il a fait au iour dui & si vous dirai bien quele. lors li conta comment li doi frere lauioient enchauchie & ocis meusent fait il se il ne fust qui pour moi rescorre rompi ses aniaus par la forche 5 quil auoit es mains si toli a .i. des cheualiers sespee & ochis les eust se il ne sen fuissent fui si eusse este mors se sa prouee ne mi eust aidie quant celians oi cele nouele il sesmerueilla mout de cele auenture si li dist lors ha<sup>7</sup> diex quel damage que il nest en son droit sens. certes iou ne kerroie mie que il ne fust vns des meillours cheualiers del monde. 10 ensi parloient de lancelet & lor poise que il ne seuent que il est. & li sires de laiens dist que il ne le meteroit iamais en fers ne en buies. car il se tient asses en pais. & sans faille il iert ausi cois con sil fust en son droit sens. mais ce lochioit quil ne beuoit nene mangoit & cestoit ce qui plus le tenoit en sa maladie. deus ans fu lancelet auoec bliant tant quil ot si perdu le sens quil<sup>1</sup> ne<sup>1</sup> sauoit<sup>1</sup> quil faisoit. ne onques dedens cel 15 terme ne vint laiens qui le conneust. ne il ne sorent onques son non car il meesmes nel sauoit mie.

A lentrete dyuer auint que par deuant la tour ou il gisoit passoit uns pors sauages & apres uenoient chien plusour qui prendre le uo- 20 loient mais il se desfendoit moult durement & lor liura souuent estal. & apres les chiens uenoient ueneour. quant chil<sup>2</sup> qui estoit en la tour uit passer le porc qui sen aloit en tel maniere il li prist talens daler apres. il descent & vient a la porte si trouua .i. cheual ensele & .i. glaiue apoiiet contre le mur & vne espee pendant a larchon de la sele. il vient au cheual 25 & monte sus. entel maniere senuait apres le porc tant comme il pot esperouner & se feri en la forest la ou il la vit plus espesse & sieut le porc criant & semo-[*fol. 157, col. b*]nant les chiens tant comme il puet si a tant ale en tel maniere quil vint en vne ualee

Lors saresta li pors & commencha a liurer estal as chiens & sen ochist 30 plusours en poi deure & lancelet qui uenoit apres le glaiue alongie fiert le porc si durement en lespaule senestre que li glaiues uole en pieches. mais il nel blecha mie granment. & li pors qui fu aires & caus fiert le cheual parmi les flans si quil le porfent tout mort enmi le chemin & lancelet saut sus & a tant de sens quil a trait le branc du fuerre & li 35 pors li aceurt si li met le dent parmi la quisse & li fait plaie grant & lancelet le fiert parmi la teste si grant coup quil li fait la ceruele espandre si labat mort & si se sent<sup>3</sup> tel atourne de la plaie que il a que il ne puet aler auant ne arriere ains se sent asses angoissos si sasist desous .i. arbre & nauoit mie tant de sens que il estancast sa plaie que ele ne sainast trop. 40

Quant uint a heure de none si auint que deuant lui passa vns hermites qui mout estoit preudom & quant il vit le porc mort & les chiens

<sup>1</sup> Repeated in MS.<sup>2</sup> MS "chi."<sup>3</sup> MS not quite distinct.

en tour lui plus de .iii. & vit lancelet qui gisoit naures desous .i. arbre. il vint tantost cele part & le salua & cil qui ne sauoit nul bien ne sona mot & li preudom li demanda quil auoit & il li dist tantost quil estoit naures. sire fait li preudom qui vous a che fait & cil est tant nices que il ne li set  
 5 dire fors que li pors le morst. enondieu fait li preudom vous estes mal baillis se vous ne troues qui vous ait car vous aues tant de uostre sanc perdu. & pour ce vous loeroie iou se vous le poies faire que vous uenissies iusca nostre maison qui est pres de chi. & illeuc se dieu plaist troueres vous garison de uostre maladie. fies de chi fait lancelet ales uos ent iou  
 10 nai nul mal. ales uos ent haꝝ sire fait li preudom que che est che que vous dites se diex mait iou quit que vous estes mors

Quant lancelet uoit quil le tient longement en parole il li anuie mout. lors prist sespee qui les lui gisoit si<sup>1</sup> le hauce pour lui ferir & cil se trait arriere. & quant il uoit quil ne puet a lui auenir si li iete & le quide  
 15 ferir parmi la teste. mais il faut pour che que li preudom guenchi. lors aperchut il que il estoit hors du sens si se part dilleuc & pense que il amenra gent auoec lui qui le porteront en son hermitage [*fol. 157, col. c, verso*] pour chou que preudom li sambloit si senuait iuscal recet dun cheualier si prent iusca .vi. serians & lor dist quil auoit trouue en cele  
 20 forest le plus biau cheualier du monde qui un porc sauuage auoit ochis. si grans mescheanche li estoit auenue quil estoit hors du sens si croi que che li soit auenu puis que il fu naures. & pour chou uaueroie iou sil uous plaisoit que uous le presissies par force & laportissies iusca nostre hermitage. si quil i peust garir. car sil demoroit gaires illeuc a ce que la saison  
 25 est froide il ne porroit estre quil ne mourust. & che seroit trop grans damages. & chil dient que che feront il uolentiers. il uont la ou lancelet estoit & font vne biere cheualereche & le misent ens uausist ou non si lenporteront en tel maniere en hermitage au preudome. il auoit od lui .i. compaignon qui ot este cheualiers & mout sauoit de plaies garir si sentremist tant de lancelet pour dieu & pour carite que il fu tous garis ains  
 30 que il eust .i. mois passe. mais pour la paine quil traioit & pour la poure viande que il nauoit mie a prise enpira il mout durement & fu pales & maigres & afebloies & mal vestus dont il fu plus mas & plus hors du sens quil nestoit deuant & se parti de laiens teus & mal uestus par la  
 35 grant froidure dyuer si maigres & si chetis que apaines pust nus quidier que che fust lanchelos.

En tel maniere erra lancelet tant que il vint a corbenich & quant il entra el castiel li enfant & li garchon si tost comme il le virrent le counurent a fol & hors du sens si le commenchièrent a batre & a ferir &  
 40 a faire noise & grant oiee apres lui se le couchierent en tel maniere quil lor commencha a ieter pierres & tant quil en naura plusours cel iour & tant quil commencerent tout afuir deuant lui pour ce quil ne trouoit nul si fort quil ne debristast tout alabatu & ence quil crioient & disoient

foies fuies uees chi le fol si en fu cele parole<sup>1</sup> parmi le castiel que tuit le uenoient uenir & il ne demouroit en nul lieu ains aloit par toutes les voies<sup>2</sup> cachant les vns & les autres si trouua asses cel iour qui mal li fist. & tant que il ne pot mais souffrir lanui que il li faisoient ains lor entournoit le dos & senfui iusca la maistre fortereche du castel [*fol. 157, col. d, verso*] si entra dedens comme chil qui ne trouua qui lentree li deueast. 5 car mout estoient li seriant de laiens cortois & de boinaire. a cele eure que on mangoit laiens ientra lancelet. & chascuns le commencha a apieler & il commencha a mangier comme chil qui auoit mout grant faim & quant il ot mangie il sala couchier el palais sour fuerre que il trouua. en tel maniere fu lonc tans que il ne fu couneus de nului & il ne se presissent iamaiz garde que che fust lancelet. & il ot a mangier & aboire a grant plente. & le reuestirent de lor vies dras li seriant de laiens. & pour ce & pour le repos que il troua amenda il mout en poi deure & 15 reuint en sa biaute & en sa forche.

**V**n iour apres paskes auint que li rois pelles ot fait dun sien cousin nouuiel cheualier & pour lamour de lui ot il doune reubes a plusors homes. & chil damoisiaus qui estoit cousins le roi amoit mout lancelet. & le tenoit ades od lui ne onques pour cose que il li ueist faire nel laissa. & si tost comme il fu cheualiers & il ot uestue sa reube il apiela .i. sien 20 seriant & li dist ua moi querre le fol & quant il fu uenus il li dona sa reube & le fist uestir deuant lui. quant lancelet ot uestue la reube au cheualier il fu mout biaux si not laiens nul qui le ueist qui nen eust grant pitie si le plaignoient mout entreus & disoient que cestoit mout grant damages de lui quant si biaux cheualiers comme il estoit auoit 25 perdu le sens & le memoire. & quant li rois le uit en tel reube si biele & si boine si dist a soi meesme quil ne croit pas quil nait este de haute gent estrais car moult bien le sambloit.

**C**el iour entra lancelet en vn verger desus la tour qui mout iert biaux & plains derbes si auoit vne fontaine desous vn sicamor qui mout estoit bele & nete. & quant il fu uenus a la fontaine il en but & sen dormi deles si uestus comme il estoit & apres che ne demoura mie grantment que uint<sup>3</sup> la fille au roi pelles cele pour cui lancelet auoit este cachies de court si mena auoec lui grant plente de damoiseles si commencerent a iuer & a caroler & a chanter les vns & les autres parmi le iarding 35 si com damoiseles font maintes fois si comme eles commencent a iouer auint que vne damoisele qui mout estoit de haut parage senbati sour lancelet qui dormoit sour la fontaine si en ot al premiers grant paor. mais puis saseura quant ele uit quil dormoit si aprocha de lui & le commencha a regarder & le vit tant bel & tant auenant que il li est auis que 40

**Q**onques mais ne uit ausi bel home.  
Quant ele lot esgarde grant pieche si sen retorna [*fol. 158, col. a*] a ses

<sup>1</sup> "porte" omitted.

<sup>2</sup> ? Not legible.

<sup>3</sup> Not in MS.

compaignes & le laissa dormant. & la ou ele uit le fille au roi pelles si li  
dist dame se uous uolies ueir le plus biel home del monde iou le uous  
mousterroie. mais iou ne uaueroie que nus fors vous & ie le ueist pour che  
quil ne sesueillast. comment fait ele laues uous trouue dormant. oil fait  
5 ele les la fontaine. ore ialons dont entre nous .ii. car nus autres ne nous  
ifera conpaignie.

H. OSKAR SOMMER

ASTOLAT, CAMBERLEY,  
Surrey, England